

05/10/1997

Pemuda Umno persoal tindakan Time, Newsweek

KUALA LUMPUR: Pergerakan Pemuda Umno mempersoalkan tindakan media antarabangsa, Time International dan Newsweek yang mendesak Datuk Seri Dr Mahathir Mohamad meletak jawatan sebagai Perdana Menteri.

Naib Ketua Pemuda, Hishamuddin Tun Hussein, menyifatkan tindakan itu sebagai cubaan media asing untuk mengganggu dan mempengaruhi kestabilan politik negara ini.

Beliau merujuk artikel Newsweek bertarikh 15 September lalu yang secara tersirat menggesa Dr Mahathir meletak jawatan dengan memetik kononnya pemimpin Umno tidak senang dan marah dengan cara Perdana Menteri menyelesaikan masalah yang dihadapi negara sekarang.

"Pemimpin sesebuah negara dipilih oleh rakyatnya. Begitu juga dengan pemimpin kita dan kita tidak perlu orang luar mengajar kita cara bagaimana hendak mentadbir negara," katanya selaku Pengerusi Majlis Hal Ehwal Antarabangsa Pemuda Umno.

Sambil menganggap tindakan media itu mencabar dan menyinggung perasaan pergerakan itu, Hishamuddin dalam kenyataannya semalam, berkata ada pihak mengambil kesempatan dan membuat helah sebagai cubaan mengasing dan memulaukan negara ini, di samping melaga-lagakan pucuk kepimpinan negara.

Hishamiddin turut membidas tindakan Associated Press (AP) yang memutarbelitkan fakta dalam laporannya 1 Oktober mengenai temu ramah Timbalan Perdana Menteri, Datuk Seri Anwar Ibrahim dengan majalah Time.

Menurutnya, AP memetik Anwar sebagai berkata Malaysia perlu mengekalkan pertumbuhan ekonomi sekurang-kurangnya empat peratus bagi mengelak rusuhan kaum.

"Jika kita baca temu ramah itu tidak ada langsung sama ada soalan mahupun jawapan yang berkaitan dengan rusuhan. Tindakan tidak bertanggungjawab penulis ini adalah cuma khayalan atau imaginasi semata-mata," katanya.

Sementara itu, Majlis Muafakat Pembangunan (MMP) pula merakamkan setinggi-tinggi penghargaan kepada Dr Mahathir berikutan kenyataannya di Menterido, Uruguay yang menyatakan negara ini dapat mengatasi sendiri masalah krisis mata wang dan pasaran saham.

Pengerusinya, Mohd Azmi Abdul Hamid, berkata tidak ada maknanya pembangunan dan kemerdekaan jika kita terus tunduk kepada telunjuk negara maju.

(END)